

王文安公詩文集

王文安公文集卷之三

男祐編集

記

重脩泰州儒學記

正統十四年己巳冬重脩泰州儒學既訖工學正陳孟旦遣州庠生薛振具書其事來請記曰州之學廟堂門廡歲久頽敝監察御史蔣公誠按巡淮甸至泰視之以朝廷屢下詔興學勸士學可廢而不脩乎乃出已之俸錢為倡於是知州黃信與僚屬各捐廩俸市材木募工匠伐石治甃而富民巨商聞之亦以粟帛為助百費咸備乃撤其所謂頽敝者並手偕作大成殿兩廡靈星門泮

池池有亭門外又開三池築臺其中以樹花木殿之
後明倫堂三齋堂後新作崇文閣高峻深廣以貯經史
百氏之書其旁廚庫之屬靡不周備而規制視舊有加
夫初以城中運水石甚艱乃相地所宜開小河二里許
引水抵學門之南以省運者之力人皆稱便凡所以經
營籌畫皆蔣公而竭力興作者信也協同其謀者提調
學校監察御史孫公鼎巡按監察御史周公紀贊相者
揚州知府韓公弘督工匠者州判余敬鎮撫韓斌功垂
成吏部尚書趙公新以巡撫至加以督勵獎勵吏民欣
喜其成也人不以為勞孟旦之所述其情如此嗚呼學

校之建教育賢才以為天下之用國朝

列聖相承為治之道本於用賢以學校為先務既命郡縣
脩學宮又置憲臣專理學政其法嚴矣矧淮海之濱秦
為名州士多才俊學不加脩葺可乎蔣公敦厚清慎執
法無私所至姦邪屏跡吏民悅而尤以修學為已任
使泰州之學煥然一新可謂知其所重為今之名御史
也已秦之士來游於學者可居安而自逸乎必朝夕孜
孜從師取友習詩書禮樂之文講忠孝仁義之道出而
致君澤民斯無忝於為士無負於

朝家建學育才之意蔣公之修學孟旦之請文皆有望於

此也故為書之以記于堂

雷公廟禱雨記

大同古之雲中郡也郡城西北二十餘里有山巍然而
高山之陽有雷公廟其神則相傳昔有雷姓者正五剛
方死而有靈邦人祠之水旱疾疫必禱舊有碑下載其
事謂廟建自元魏時歷唐宋至遼金益大其廟元末燬
于兵

國朝洪武壬子鎮守都指揮使周立王約復建廟有禱輒
應人敬仰之廟稍壞必爭加脩葺至于今翼然如新也
聖天子在位之七年為正統辛酉夏五月大同不雨鎮守

總兵官征西前將軍武進伯朱公冕理將閫戎務山東
右參政沈公固暨都指揮馬公義大同知府樂瑄齋沐
禱于神乃大雨禾秀而茂六月天不雨公復禱于神又
大雨是歲郡中大稔郡耆老與衛之列校頽刻石以紀
靈應而瑄以考績來京乃請予記嗚呼風雲雷雨其神
所當祀者而雷則陰陽相薄而成穀赫然有神先儒謂
在天之神陰陽造化是也斯廟未必非雷神而又以為
雷姓者為神果誠然乎亦豈非其人能禦災捍患有德
及人故神而祀之歟夫天神也人鬼也有幽明之間也
未易昭格者也能秉一心之誠以祈以禱則必有所感

通所謂天神格人鬼享又曰有其誠則有其神是已征
西公來鎮此邦號令嚴肅將士效用遠鄙安寧旱而致
禱輒應豈特能副

上委任之重哉又能以誠而格神也能憂民之憂不使民
饑困者也神之靈征西公之誠宜有記凡後之蒞是邦
者必有所視效於是廟必加崇祀焉瑄之徵記在辛酉
冬予莫考神之詳未敢執筆後二年癸亥夏始勉為之
書而沈公則拜戶部右侍郎仍理戎務云

大明重建南嶽廟記

自古帝王御極主典神天於名山大川之祀以五嶽為

大南嶽衡山也廟在赤帝峯之陽崇祀之禮粵有恒典
聖天子仁明睿智統承

太祖高皇帝鴻業尊居大寶德教弘敷禮樂明備文章制
作炳然煥然光昭列聖之謨烈致治之盛底于太平而
秩祀百神罔不祗肅維是南嶽廟之棟梁楹桶歲久摧
壞衡山知縣臣何義請加修葺

上以因其故修之圖其易非經久之計詔有司撤而新之
於是湖廣藩臣承命惟謹以衡州府知府鄒良肅正有
為俾之經營相度專理其事良乃殫厥智慮與同知胡
忠通判祝孟簡唐敬衡州衛指揮常旺范真等計其工

費各捐已俸措以供用乃發屬邑及旁郡之民伐石取
材冶鐵陶甃百用悉備而孟簡敬率照唐孫宿知縣
蔡森龔倭陰陽學官張瑛桂陽州判官秦正等董工匠
集衆力並手齊作良又躬自督勵晨夕罔敢有懈功垂
成以致仕而去吳興余觀朱守是郡推官王潤繼至以
前守之功不可稍慢相與協心致力功乃告成正殿寢
殿前後並峙而東西有廊內外有門中有亭旁有宮有
堂有齋廬廚庫暨神之像設繪飾金碧俱輝煌一新矣
禮科給事中王公詔衡山人也以進士列官近侍操行
清白謹於禮文喜廟之成手疏其始末徵予以記嗚呼

衡嶽在南方其地遠其山高峻磅礴上直軫翼下跨湖
湘七十二峯環列左右巉峩奇秀巖壑深阻險絕幽邃
不可窮極靈氣所萃神明所都廟宮其可弗稱

上特命鼎建而二三守臣能體聖意興作以時勸勵有法
人樂趨事以致其成功如此夫祀神禮也感神誠也新
嶽廟祀之盡禮感之以誠也誠之至神其昭格百靈助
順山川出雲甘雨時需蒞長萬物五穀歲稔民飽而嬉
灾厲息疾南服寧靖以昭

上事神之誠惟神永享廟祀惟國家奠安如泰山磐石至
於萬年之久於廟之建宜記以示後世其經度在正

統六年辛酉夏明年壬戌春興工成於十二年丁卯冬十二月始終凡七年云

重修西安府學記

陝西在昔為都會而西安則陝之大郡也郡學在城之中

天朝平一海宇因其舊址一新廟學歲久圯壞守臣不加繕修都察院副者御史陳公奉敕出鎮於陝以肅憲度鉅姦蠹綏民人整飭邊務為任而公乃首謁學宮觀其樊陋於是與守陝都督鄭銘暨都司布政按察三司諸官議各捐俸錢令有幹局者典其事募民伐石陶甃聚

材鳩工度其所用充足刻日興作人皆欣喜相與協力
脩大成殿暨兩廡腐者易之欹側者正之頽壞損折者
補之使之完固外作戟門靈星門鑿泮池引渠水通其
中允庭宇隘者廓之垣墉卑者增崇之功既就會都御
史王公勣代公還朝王公加以完美已而

上復命公鎮陝公併脩學舍新明倫堂葺西齋作左右會
經二堂暨庖厨器皿之屬無不備具西安之學煥然而
新規制有加于舊矣學之師生卽之吏民相與頌公之
功而布政使王道按察使鄧縠與僚佐謀非刻石無以
垂示久遠致書屬僉事莊觀以記為請鳴呼賢才致治

之本建學育才自古君天下者以為先務考諸經史可見也

聖天子以文武太德嗣承列聖之統崇儒重道大興學校教育賢俊資以輔佐太平之治屢命郡守縣令修學勸出又藩方各置憲臣一人專理學政必欲士皆成才可致於用而守令多不加意焉陳公提持憲綱鎮禦大藩脩建郡學不勞民費財而致其功成之易如此蓋善於經畫措置衆皆樂於趨事耳然公之意非止於此也西陲於地河山之固土壤之厚文武周公之教素所漸被風化民俗之美見稱於昔而又有大儒橫渠張子道德

之言足以垂世教化民俗然論者謂近時陝之士風習俗稍不如昔夫豈人性有異哉教道有所未至耳果能誦詩書明禮樂盡忠孝守仁義敦信讓其俗將反薄歸厚人皆有士君子之行可以為國家之用則士非徒學也無負於

上之所以教育也此公之所以望於陝人者也公之脩學其功誠可紀述遂為書之公名鑑字有戒世居姑蘇以進士擢監察御史累陞副都御史今拜右都御史居臺端志操峻潔鎮陝端重有為吏畏其威民懷其惠按行邊陲整飭武備儲積兵餉政令嚴肅將士效用銘以都

督守陝謹寔有才勇退字景陽會稽人祭字
盂皆以進士登身至長方岳學之脩摩於正統六年辛
酉春二月訖工於八年癸亥秋云

愛竹軒記

錢塘趙昂所居有湖山之勝居傍多種竹久之益茂凡
數千竿綠陰蔽日清風時來其趣脩然可賞也昂雅好
清致與客坐其下或投壺或彈琴或審酒浩歌以適其
意於竹蓋甚愛之也因名其居曰愛竹之軒士大夫多
賦詩以歌詠之會昂以郡辟為從事上銓曹選入文淵
閣供纂脩之務授職浦城縣幕官去家雖遠而於竹未

嘗暫忘來觀京師請予記其軒錢塘東南繁華之地其人秀敏多藝能居室修麗服用華靡所植皆奇花異卉以供耳目之玩於竹則未甚好也而昂獨愛之如此何其異於他人哉夫竹虚心勁節不為風霜所摧隱然有君子之操好之者必將以勵其節槩如竹之堅貞焉昂之志必在斯也不然何以愛之深耶乃為記之以著昂之於竹非徒愛之也

重修絳州儒學記

絳山西名州也王君汝績為州守政清訟簡吏民稱之汝績猶惕然以為未至此年來朝京師謂予曰州務粗

達惟州學興陋未獲改作予白宜亟圖之當大書以記
其成汝績還降乃率僚屬捐廩俸市材木募工伐石開
甕又勸民之富者出粟帛為助久而百費咸備乃悉撤
其舊卜日興事工匠役夫川湊雲集先作大成殿次兩
廡靈星門神庫神廚及明倫堂齋舍鏤堂皆一新而聖
賢像亦皆繪飾光華焜耀視舊大不侔矣初大成殿成
學正劉章徵前大理少卿薛公為記至是將之士願詳
書其始末以垂示永久汝績又以予嘗許以執筆致書
請記夫學校作育賢才之地士之游於斯者講二帝三
王周孔之道出而為天下國家之用此豈細故哉善為

政者必重於此而近時守令多迨其事焉

皇上興學之詔屢下猶漠然有不加意者余因是竊歎今
四方釋老之官稍廢則其徒必作而大之守令士也於
二帝三王之道蓋嘗講之而於學之建置有不暇為反
不若釋老之徒矣亦何心哉不推其本不知所重者也
絳之民務稍劇前時守絳者以為難治未久輒罷去汝
績獨久於絳又重建學宮勸勵其士讀書誦詩欲其學
成而致之於用能體

上之聖意以興學為重者其汝績歟夫為政能舉事之重
者而成之則其政之施可知矣宜絳之吏民稱汝績絳

之士願記其學之成功也余故為書之汝續江西金谿
主今登鄉舉典教政和以薦為絳守學之建協力者同如
某贊之者學正劉章訓導任原李敬馮駿董其役者耆
老段祐德梁適均陳本仁柴德成杜仲傑魯仲高經始
於正統十二年丁卯春訖工於十三年戊辰秋八月記
則明年己巳冬十月云

遺安先生遺像記

遺安先生周公仲德之卒在洪武壬午夏五月後十有
八年是為永樂己亥先生之孫刑部員外郎忱以先生
遺像示予觀之肅然加敬曰嘗聞周氏居廬陵累世顯

宦其人獨不嗜富貴刻志讀書隱而有德者唯先生而
已惜今不可見矣見先生之像寧不為幸乎蓋先生在
元時已卓然負才名左丞周公伯溫一見以大器期之
值時將危乃絕意功名而先生之父伯明甫方為南康
知事亦棄官與夫人譚氏歸故鄉會歲大飢人相食先
生請於母夫人以金易粟濟饑者夫人大喜遂為粥以
食之全活者甚多死者棺斂而瘞之未幾譚夫人卒盜
賊蜂起乃奉南康公避亂山谷盜卒至先生悉遺以橐
中金帛曰幸無恐吾親也盜驚歎不敢犯而去初先生
之高祖豫章郡公守廬陵時以常平倉歲給不足割田

萬餘石益之名助平義廩至

天朝海字既平有司竊田欲以歸先生乃力辭曰吾專其
利豈先祖置義廩意邪請給與耕者為產先生署券一
毫無所取嘗儲粟千斛有發而食之者人取其母所製
棺與簪珥償粟先生悉不受姊早寡養之終身友人死
無子撫育其弱女具粧奩嫁之兄弟有爭訟者連年不
釋先生喻以大義兄弟遂和好如初先生之行誼如此
於乎非所謂有德之士哉故其沒也鄉之人無少長責
賤莫不哀慟悲慕至今談道其德者猶不置諸口此予
聞之詳也夫士之賢者非其時隱身不仕有魏桓事親

孝使盜賊不加害有江革司馬芝能以財濟貧之助死
者以棺有趙子武卹他人遺孤如己所生有吳長文此
天下後世所稱羨者而先生兼有其善宜乎人皆思慕
不忘况觀先生之遺像者哉古者有德君子像而祠之
于鄉使人有所景仰非先生其誰邪先生卒之年壽七
十有一平生著述悉藏于家雅好龐德公為人題所居
曰遺安堂鄉人因尊之曰遺安云忱於予為同年友思
念祖德未嘗有忘故為述其概又系之詩以永其孝思
也詩曰吁嗟先生令儀溫溫南康之子忠州之孫既殞
其學邁時之迹惟克孝友匪射于利饑民嗷嗷群兇相

晚先生閱焉以沛其施彼孤登者懷之煦之彼閱場者
亦既喻之彼不我欺孰敢違拒衆口喁喁嗟維先生迪
我小子厥心孔臧先生之德終則不忘瞻此遺像生氣
凜然先生所蓄其全者天徵在于孫有永其傳

水木清華亭記

吳縣知縣吳復克禮世居福州螺江之陽有亭為燕游
之所名曰水木清華亭蓋取晉尚書謝混西池詩之語
云螺江地幽曠而亭之作據其勝近則嘉木森聳亭臺
如車蓋清陰蔽虧涼颺時至水環繞而流明淨如鑑迴
風激波遊魚出沒稍遠則有虎頭之峯若顧若矚若踞

自南盤迴而西與羊嶠諸山相連屬而石陝渡在其前
飛來石峙其後朝暮之間雲霞之舒歛霧雨之冥晦草
樹之蔥蒨與夫平皋遠岸沙鷗水鳥飛鳴上下遠近之
景於斯亭一覽可見克禮日游於其中或讀書咏詩或
彈琴酌酒或憑闌縱目意休休然甚適也嗟夫人之情
所好不同馳騁車馬於通都大邑與王公貴人遨遊窮
極乎耳目之所好者人皆悅之而山林泉石草木幽寂
之境好之者甚少克禮獨愛悅焉蓋異於時人也已非
古之所謂居高明而遠眺望者歟吳縣大邑也政務煩
劇克禮為邑宰清慎平恕事亦苟擾民甚安之此可見

其素所操履矣然而教譽方隆顯用可待未得歸游亭
之中以遂其樂乃屬中書舍人周其道其詳請記予嘉
其志書以為記復招之以詞曰

螺江之流兮泝泝濱江之居兮君所止白石磊磊兮山
峙峙煙雲杳藹兮古木陰翳君之去此兮歲月逝猿啼
鶴怨兮誰與為侶盍歸來兮日容與擷芳華兮憇江渚
膏吾車兮遠相從濯清冷兮追涼風發高咏兮彈絲桐
亭中之樂兮與君同

莊氏水竹居記

祥符縣簿莊君子珪考績至京師求予文記舊隱水竹

之居莊氏其先家靈璧南宋時徙居浮梁至迪功郎某
又徙金谿遂為金谿人去縣治北四十里五峯之陽前
有大溪居在溪澗乃引水瀦為池池左右種竹莢拔而
森蔚風止雨霽則色秀濯濯上凌雲霄影如龍蛇縱橫
盤錯與波光相盪淵淪虛明湛然可愛君日處乎其中
玩其幽淡之趣以清脩勵行者三十年矣始以賢良徵
累遷至為簿又九年矣而君之於居也猶頃刻不能
忘焉常人之情出於遠鄉下邑一旦躋顯融居廣廈而
享膏粱文繡有耳目之娛其必自侈焉於昔之所處者
已無所係於其心矣君何獨眷眷於是哉君蓋端厚人

也其在科符時勤慎而有守介特而不詭隨又慈惠寬
愛不勵其民政以是而成故其來也民皆願晉之君之
所得者如此非其守之有常養之有素而志不可奪者
乎不然何其能異於人哉夫古之君子以天下之物不
足為玩而又有取於物焉蓋以其有可尚者非徒以為
玩耳是故玉以比德也源泉喻道也松栢以比君子之
操也至於水之清竹之勁直則見於漢漢之詩以美乎
為學自脩之功此衛武公之德盛美而形於歌咏者有
取焉然則莊君始而隱中而仕意恒在乎此者非托物
以為玩也其竊有慕於武公歟亦宜其砥礪名節始終

而不改也若然豈止於一簿哉居予同邑也嘉其志於
善道故為之書

環碧堂記

盱江山水郡也郡之士李氏文極樂其所居之勝名堂
環碧其弟文達來京師請文為記按地志時之山其大
者曰軍峯曰麻姑其下則時水注流為江與二山襟帶
郡城其流又潯為雙湖在城之隅是皆一州之鎮也而
文極之居則前山右湖而左其江禹山之勢望之若萬
馬之騰驤鉞戟之排擻盤迴起伏上摩霄漢凡數百里
林木蔥蒨烟嵐蒼翠朝暮之間雲收雨止其色與湖光

相過如長虹素練淵澄演漾一碧千里而其間風鷗沙
鳥岸並汀蒲稊然可愛者又不可名狀一郡之勝皆在
於此而斯堂也獨得之亦宜乎文極之所樂也是以堂
之上左度圖書右列琴瑟前具壺觴日與士大夫讌游
雅歌擊節以玩其景而暢其志者固足以自適矣然而
文極之樂尚未止此也文極兄弟凡五人皆個儻瑰偉
而其母孺人亦壽考無恙文極與諸昆弟旦焉登堂以
起居焉暮焉登堂以甘旨焉老者坐少者侍幼者提携
以進怡愉歡忻恩愛浹洽此殆他人所無而文極有焉
然則文極之所樂如此誠有未易及者矣蓋人之志趣

恒好富貴聲勢以馳騁於時而厭山林寂寞者多矣惟
閒曠雅淡之士外物不足以累其心而以山水自樂焉
今文極既得之又兼有兄弟親友之樂則其所樂也益
出乎山林之外矣予嘉之故為記俾刻諸堂以垂永久
焉

雙桂軒記

金谿之西北其鄉曰迤福余氏居之其人多讀書力本
曰慶字克忠者少為縣學弟子獲交於予學故有桂樹
大數圍俯堂之前克忠顧玩而樂之乃歸植二桂于所
居之軒久之喬然而高枝幹駢聯交錯偃然若虬蟠蛭

結而其葉蔭然蒼翠望之亭亭然若車蓋而並列若幢
幡秋高氣肅則其華爛然而吐若芝蘭之馨鬱龜之芬
可掬而可愛因名曰雙桂之軒克忠自學宮歸則休于
軒之中把書史偶二桂而坐或攀條吟哦風颭然意益
喜其植之有成也嗟夫草木之可貴人皆好之若桂與
松栢桐梓之屬尺寸之根培之以待其暢達翹楚至于
千尋而偶自不幸焉蠹蝕之風雨歆之斧斤侵之彼不
得以遂其性而徒為慨惜耳古之君子固未嘗留意於
此然苟有所為而植之其成也蓋亦有不偶然而致者
矣闕里之檜王氏之槐萊公之栢愈久而愈茂者此不

但雨露為之潤澤風雲為之擁蔽蓋必有鬼神扶持乃
至如是邪克忠之植二桂也既無所謂靈驗歆折之患
而終至於鬱然可觀亦信乎其有異歟故凡鄉之長老
子弟咸相謂曰克忠力學務實斯桂之茂乃其擢科之
徵永樂乙未克忠果以書經登進士第為庶吉士顯庸
將自此始而猶不能忘情於二桂焉屬記於予乃為詞
以系之

桂之叢叢兮維予所植盤根深固兮不摧而翳虬枝連
蹙兮葉萋萋吐其華兮都而麗嗟桂之秀兮異衆芳予
何為兮獨所媚含芬香兮佩珩璫振長策兮凌太清振

雲乘風兮恣翱翔兮欣欣兮樂且康寧不思兮桂之樹
獨婆娑兮凌霜露盍歸游兮樹之下

梧竹隱居記

梧與竹草木之佳者也咏於詩載於傳記其為物信可
尚已段君紹昌居金谿邑治之南學宮之左居傍植梧
數株竹數千竿歲久梧之挺特竹之蕭森翠葉蒼蒼清
陰蔽虧紹昌撫其清標玩其雅操歌高岡鳴鳳之什衛
風淇澳之詩顧而樂之遂名所居曰梧竹隱居而徵予
為記先儒謂梧為青銅華淨妍雅種之多近齋閣其素
鄂皆五行則虛心勁節凌操霜雪不改其操人多愛之

以其有君子之德焉紹昌嘗桑榆之年以介直之行隱而不仕而獨愛玩於梧竹者豈徒然哉則九世之他草木攢華纖麗者舉皆有所不取而其志操亦豈不若梧之挺然竹之森然者邪君子之於物既愛而玩之固非但取適於耳目焉紹昌之於梧竹是已誠可喜尚也故為記其居尚以期紹昌之志砥勵節概始終於斯而不易也

順德堂記

王君與京世為金谿右族至與京尤端厚循雅鄉之士大夫多敬讓之樂與游處嘗名所居之堂曰順德其子

秉鎮適來京師致與京之意求文為記與京余同里也
相友且厚善誼弗獲辭因為之言曰順德者即傳所謂
孝弟也者鮮有犯上作亂程子謂之順德者是也夫孝
善事父母弟善事兄長出於天性所固有非勉強矯飾
而為之孩提之童皆知所以愛親敬長也然而世俗
靡風氣日漓反有失其本心則父母有不重於獲鋤箕
箒而兄弟有輕於尺帛斗粟者矣惟君子善推其所固有
盡其道於日用之間愛其親也不敢斯頃懈怠敬其
兄也不敢頃刻慢戾肅雍于一堂之上熙熙然和樂之
意形於辭色非所謂順德者乎與京蓋深能勉力而行

之所以名其堂者意有在也必由是訓勵諸子孫皆勉以孝弟之道久而勿替使鄉之人益稱王氏多賢余之言其不誣矣雖然易之象又曰地中生木升君子以順德積小以高大由此言之德業貴於培養猶木之生順其性則勾萌之長可至於千尋然則良知良能之發順之則德成而底於聖賢之道與京其亦有得於是乎予并叙之使歸置于堂觀者必有所省

靜學齋記

同里王君宗睿於居之傍築小齋為藏脩之所扁曰靜學蓋取諸葛武侯戒子書之言也間來請予文以記予

嘗觀武侯之書曰君子之行靜以脩身又曰學須靜也
又曰非靜無以成學武侯之戒其子何其至哉士之務
力於學者皆當從事於斯言也今夫窮經博古究極天
下事物之理學也者察其身脩其行使道明而德立亦
學也學豈造次急遽煩擾之可得必以靜而後學可成
也夫謂之靜必杜外慮絕紛華志一而心專則從容涵
養中之所得者深而學有諸已矣宗審獨知乎此當強
仕之年猶不倦於學而取武侯之言扁其齋以勵其志
可謂能慕乎古之人而有志於為學者矣則其中豈不
休休然無所係累而神凝思定自不覺其天理春融人

欲求釋學有所得者乎雖然靜學之音不特武侯之言
為然大學有曰知止而后有定定而后能靜釋者謂心
無妄動之謂靜能靜則循而至於得所止學之有得於
已者豈有窮哉此大人為學之功也然則宗審可不勉
於此乎故并書以記其齋庶幾朝夕警戒而學有所成
也

明谷書堂記

縣治之西有山隆然曰繡谷盤迴而西百餘步為學宮
又西二里俯通衢兩小岡隱隱南峙曰明谷以其面陽
而嚮明故也居岡之左右者王氏系出宋丞相荆國文

公迄今衣冠文物尤盛曰秉材則最秀而篤學者嘗作
堂聚書數千卷日講讀於其中因其地而顧曰明谷書
堂徵予為之記夫士之於居處欲得其地之勝者豈徒
為佚樂哉因譙間游息以適其情安舒其志意而優游
涵養焉則德可進業可脩矣古之人志學未嘗不擇夫
高明爽愷之地而居之也明谷雖無高崖疊嶂飛流絕
壑龍蛇虎豹之所蔽烟雲霧雨之冥晦可以憑險阻聳
觀聽然而岡阜隱起負郭而臨流環岡多杞梓豫樟碧
梧脩竹陰翳森蔚登堂而望焉則其景甚幽勝閱其書
則經史百家皆在焉秉材日焚香把書而坐涵詠聖言

從容自得所謂趣其情安舒其志意者在是禮不云乎
君子之學歲焉脩焉游焉息焉予於秉材見之德成業
廣名譽之著以振粗莠先世者豈不肇於此哉明谷之
勝書堂之名必因是而大顯矣故為之記秉材之先君
子諱字京謹厚有德秉材兄弟四人皆醇和穎秀為州
里所推諫云

蒲塘書屋記

距金谿邑治三十餘里其地曰蒲塘有山林園池之勝
徐氏世居此曰宗字躬厚者有志力學別構屋藏書數
千卷名曰蒲塘書屋屬泰安州學正劉君遂志來請曰

徐之先多顯人以家學出仕者若富陽尹孟恕福建按察僉事則寧泰寧侯師邦範紹興府學司訓克寬皆有學有行有教譽為時所重予獲與交焉躬學則寧之佚子也又廣其居儲書其中非有志於學者歟夫士之學也豈徒務其名哉於聖賢之書朝誦暮讀孜孜不懈而後有所得先儒曰古之君子無頃臾而不學故其德無頃臾而不進夫德進則業廣必出而為天下國家之用以行其學者也躬厚以簪纓之胄家庭之訓知為學之道有素書屋之所貯者必取而讀之究其旨探其端撫其華取其實咀嚙其膏味學得於已其所施者必廣且

夫振耀於時以繼美乎前人也必矣書屋之名豈不垂
之無窮哉予嘉躬厚力學而其志必有成也故記其事
屋以俟

遺祭感應記

正統十年夏六月丁巳

詔臣英往會稽祀南鎮之神初巡按浙江監察御史臣
艾茂等奏台州寧波紹興三郡屬縣民疫死者數以千
計

聖天子覽奏惻然命有司厚加存卹又親製祝文具香幣
命臣英祇奉牲祭告冀神殄災祐民臣英以七月戊寅

至朔方岳三司諸官即日齋沐出止宿外署也卯左布政使臣孫原貞按察使臣軒輅謂事神當嚴先往飭勵群執事且視牲牢品物必致精潔庚辰臣英暨叅議臣趙冕僉事臣歐陽哲署都指揮僉事臣脫剛等偕往至會稽城知府臣羅以禮率官屬耆老恭迓香幣忽陰雲彌布及晚風雨通夕辛巳大風雨及申乃止壬午四鼓天宇澄霽衆星朗列獻奠之際雲霧翕合天風飄揚林木振動旌旄飛舞神靈洋洋如在左右禮終雲收霧歛星彩復見與祭大小諸官靡不忻喜初會稽諸縣久旱至是乃雨田野霑足明日他縣馳報大雨飄風沙氣消

殄者相繼而至嗚呼古者水旱疾疫必禱于神庶神之
感格有所未易也惟

皇上以至聖大德君臨天下仁愛斯民無所不至以民有
疾禱于名山神祇效靈天實昭鑒霖雨大降膏澤下土
昭蘇民物此豈偶然哉聖心純誠之所感也書曰惟德
動天又曰鬼神無常享享于克誠豈非此歟會稽吏民
扶携奔走歌呼相慶請鑿石刻御製祝詞以昭

聖德垂示後世而原貞輒謂英奉命而來請為記遂即其
實而為之書

王氏鍾秀堂記

同里王成汝續作堂額之曰鍾秀而請於予曰成之居
東有幕阜寶峯南有仙山翠雲峯鬱羅列有若屏障而
其北則隆然數山曰繡谷環學宮而南盤迴蜿蜒其地
脉至成所居而止卿之縉紳大夫登堂者曰堂之勝群
山拱顧秀色可覽天曰自成之先累世衣冠至今尤盛
諸山秀氣所鍾也乃相與名堂曰鍾秀幸惠以記予邑
多山而環邑治者其山皆崔嵬秀拔高下起伏日出崑
崙金碧煥耀烟霧重則蒼翠杳靄其間多梗楠梓杞
之材仙人釋子之宮與夫居民樓閣扶若鱗次望之固
足以覽夫山之聳秀景物之妍麗也然此未足以當其

奇也文人才士與夫秉忠孝守節義者世所多有山川
之秀鍾美於人者蓋可徵矣若汝績之先則有為員外
有為給事中及佐州邑皆表表可稱者亦豈非其人歟
宜乎汝績作堂而名之以鍾秀也周詩曰崧高維嶽駿
極于天維嶽降神生甫及申蓋言崧高降神靈和氣以
生甫侯申伯也夫甫侯申伯周之賢佐也其功業名譽
昭著顯赫見于當時垂於萬世信乎嶽之靈秀所鍾豈
後世可及哉汝績之堂其名既取於此必有所得也已
夫士之賢於人者無他以能企慕古人力於學也人有
美質而不學則其才終無所成能師法於古日夕孳孳

致力問學則德備業廣名聞昭顯豈不如古人乎汝續
登堂之際亦仰而望于群山俯而有思乎必誦崧高之
什歎高山之詩以力求其學之至豈不克然有得其進
詎有涯涘哉有光於邑治之山川而所謂鍾秀者為不
虛而堂亦非徒名也已汝續祖諱貴貞父諱仲允俱好
學務善而汝續少敏達以明經貢于鄉仕為政和縣學
司訓今滿九載當陞秩作堂益紹述其先志云

承恩堂記

廬陵江右名邑也地廣民衆比歲旱饑邑之士蕭子韶
發私廩粟二千餘石賑民之饑者有司以聞

聖天子嘉之遣使齎救書旌其為義民子韶拜舞欣喜乃作堂額曰承恩之堂以彰上之所賜也今年詣闕謝恩已乃屬禮部郎中劉公孟鐸微予言記其堂大水旱凶荒世恒有之欲民之無饑在倉廩有備耳

上愛郵黎元屢詔郡縣吏勸農務耕稼積粟為經久之計吏當究心於此也乃漫不加意致民多失業公私空乏饑饉則坐視其斃而民之力本者歲有所積乃能推以濟人之饑此誠義舉賢於為吏者也若子韶則其人矣上乃褒之旌之子韶若之何而不欣喜且名堂以昭其寵光乎雖然民者上之赤子也為之子而受恩之厚如此

當何如其感激哉吾之人有一飯而不敢忘其恩者死
上恩乎必終身無忘以圖報稱且勵諸子若孫忠君孝
親敦本力善輕財重義則庶幾無負

上恩而斯堂永世有耀矣此子韶之志也故書以爲記蕭
故大族居之里曰王步子韶之曾祖濟川祖心泉父澗
樂俱讀書有士行子韶承家制教謹孝友善琴嗜書史
居鄉篤於爲善嘗建義莊以濟貧賈義民之衆鄉人咸
宜之云

青峯書屋記

浮梁邑東有溪溪上有山高聳蒼翠其陽有浮屠之居

曰青峯寺先賢彭汝勵程瑞嘗讀書其中所居之軒曰壯圖而青峯遂為勝地文人雅士多於此而遊覽焉王文鳳氏瑞敏之士也世為淳梁名族文鳳承家庭之訓以明經領鄉舉懼其學未至作居于寺之西顏曰青峯書屋與其友戴瑋朱旭取經史諸書探究考索講說問難深有所得文鳳試春官以右榜授漢陽府學訓導瑞以薦授祈門縣學訓導而文鳳以憂去今改四川叙州府學將之官謁予請文記書屋而道其詳如此夫士之於學也必得高明幽曠之居為藏脩游息之所則心安志適優游涵咏其學以進而又有朋友相資之益其所

造詣當何如哉予於文鳳見之故其教漢陽也以學行
是推全性教叙川必大施所學以振師道使名譽遠播
底於大用以追跡彭程二君子則書屋倍有光輝青峯
之勝為之益顯矣此文鳳之志也嘉其請乃為記之

雍睦堂記

淦水之上有山曰培山其陽有堂巍然曰雍睦之堂文
淵閣大學士金公兄弟所居也公之弟幼學采省公於
北京以茲堂未有記為請公曰是不可無言以示後世
也乃俾予記之公既不鄙其蕪陋其何敢辭竊惟公之
先大夫雪崖先生為江右名儒生公兄弟凡四人公居

長次則幼學也公自擢高科累官至學士以文章經術
受知於

聖天子以清德雅望見重於天下士大夫敬光燁然近世
莫比而公之諸弟亦皆淳謹好學敦尚禮義雅家居而
歲常一人來致公起居兄弟之集恭敬和樂雍容揖讓
儀度肅然頃刻未嘗不謹也予居京師見其若是者凡
二十片矣及今幼學之來與公相見比往年則髮髮已
各蒼然而公愛之尤篤退直之暇食飲坐起必與之俱
而幼學於公亦善於敬事焉朝夕之間蓋疊疊不急也
兄弟之相好如是以此雍睦名其堂不亦宜哉嗟乎兄弟

同氣之親也。凡之愛與弟而弟之敬其兄，能親其所親也。親親之道著則家國以治，天下以平。否則恩愛弛而習俗漓，治道以之而隳矣。此非細故，是以先王之世為治必先於此，以孝以弟導其民，而民由之。父子兄弟必相為告戒，以興起其行，故曰教以禮讓而民和睦，是也。夫教之不行，人心不淑，同氣之親能不失其恒性而篤於恩愛者，固亦罕見，而其以血氣之欲形於忿爭相視如仇讐者，近時則尤多。惟公之兄弟獨異於此，翕然以和藹然有禮至老，而其誼彌篤，亦何其能若是哉。嗚呼！蓋有不易而致者矣。自公之先大夫以德行之純敦遺

於後公既善承之而不際遇盛時從容廟堂之上彞倫
大訓日稔聞之亦豈非

上之所詔父兄之所教而所以致夫雍睦者哉古者孝弟
之教復見於今日而治化之盛有不由此乎堂之記蓋
不可已也予故樂道其實而不為公言曰詩云兄弟既
翕和樂且耽公兄弟以之天曰則友其兄則篤其慶公
之子孫尚思以勉焉是乃公之意也故為之書

翠微樓記

會稽章先生可道作樓于所居之偏以四面皆湖山名
之曰翠微之樓先生既終于壽考而先生之子刑部郎

中尚來屬予爲之記且曰此先公之遺志子可無言乎
尚衣嘗與予同官翰林迎養先生至京師因得詢其所
謂翠微之勝先生曰吾之所以樂此者可以備遊觀之
美也鑑湖之泓澄俯其西俯山之聳特峙其北逶迤而
東則曹娥之江其流浩渺遠達于海不可窮極而其近
之可挹者南有覆山焉奇秀深窈亘數十里而與秦望
天姥諸峯低昂迴伏以至飛鳥之出沒遊人之往來極
遠而不可見者吾常僦園縱目一覽而盡得之吾將歸
而佚老于此子其爲我賦之予謝以不敏孰知先生竟
不可見矣嗟夫先生之雅志如是抑豈不可推重者邪

常人之情有百金之資則安於逸樂獲焉食之養則自
矜以尊貴先生雖布衣之甚然家有產業之厚居有得
養之榮而心則未嘗有羨乎此獨於斯樓之景有所樂
焉歐陽子所謂在乎山水之間者先生蓋似之其異於
他人遠矣尚文方顯揚於時雖去家日遠然而思昔之
侍先生讌游於茲執經史翼然進趨其左右今不可復
得其心亦寧不惕然哉夫心有所思久而怵惕不忘者
斯足以繼前人之志尚文其能之則樓之勝景先生之
高風雖歷百世猶不泯也予因是有所感歎焉庸書其
實俾登斯樓者覽觀山川風物之美亦有所慨慕於此

也

石門寺記

金谿南去三十里有佛寺在江之中江自盱來至此洄
狀演漾水深而其勢平緩中有盤石週迴可里許相傳
昔林木間夜有光景鄉人異之相與建寺而馬祖道一
禪師實始居此遂名曰普光山石門寺其後多名僧住
持而佛宇法堂山門僧舍莫不備具西江諸名山以石
門為幽勝縉紳大夫多登覽賦咏以小金山稱之而幽
人逸士亦或有棲遯於此者蓋不特多名僧也近年舍
宇頽圯寺僧法祐率其徒各損衣貲而好善者資助之

遂市材鳩工撤其舊而新之經始於宣德戊申冬十二月越明年十月訖工殿宇門廡庖湑煥然一新有加于昔學佛者皆萃止焉法祐遺其徒來徵詆嗚呼天下山溪之勝多浮屠所居稍廢則能興之蓋世以佛道廣大有福利及人故人人繫於趨事致其成功之易若法祐之於石門是已夫石門名勝之地也而予則願遊焉昔一至其地坐石臨流縱目四望群山聳列如屏障如劔戟高低世蘊於百里之外而一寺獨巍然中流時秋雨霽水光接天山色入雲微風不興萬籟俱寂若登方壺蓬瀛之境今別去已三十載矣高人逸士來游者必多

惜未得再至以窮其樂然法祐既新與居凡遊覽者
盡得景趣可以發舒其情予以是嘉之姑為記俟予謝
事南歸又當來游與法祐賦之以償所願焉是役也董
工協力則法祐之徒傳嵩傳昱傳晞洎其徒孫琛環瑩
瑞摠督其役者疏山寺僧緣奎云

龍池書館記

泰和縣治之西其地曰龍池表宗範氏世居之宗範之
大父顏樂先生以學行為里中弟子師而其父則明經
登鄉舉為吉安縣學教諭諱叔異也宗範生七歲而教
諭君歿顏樂先生撫育之及長有志於學別構居于池

之側水波泓澄洞映窓戶菱芙蓉蘂雜然具前而傍多
嘉樹美竹翠色深蔚連山盤迴澄江州渚環繞左右其
景幽曩可愛也而居之中貯先世所遺經史宗範日讀
書游息于茲遂名曰龍池書館今年以邑庠生貢禮部
升于太學間謁予微言為記而道其所居之詳如此泰
和江右名邑也山高而奇秀水深而清冽龍池則俯於
縣城而宗範之居獨占其勝蓋非但得其山水之趣也
能守父祖之訓教為士之行講習詩書力於學問其亦
善於繼述也哉今乃登太學與天下之士切磋琢磨以
益進其學脩其德而成其器將致於用焉其所以垂休

振耀光顯於前人者可待余知書館之名可垂于下民而龍池山川草木亦為之增輝也已此豈非宗範之志哉

進士題名記

永樂壬辰春三月朔廷試天下貢士一百五人賜馬騾等及第出身各有差是年

鑾輿巡幸北京惟題名之石未刻至是有司以是為請上以策士盛典也詔從之命臣英為記臣英受命祇懼謹執筆用紀其實竊聞自古有道之世德教昭宣禮樂明脩則賢才之多出于其時而上之人有以寵之仕之慶

虞三代元凱之舉岳牧之咨宅俊之用賢能之賓興俊
造之升進致治之效臻于熙皞蓋可以見後世盛時亦
莫不舉賢用能以致于治而進士一科有古賓興之道
意其得人為最盛也洪惟

太宗皇帝以聖文神武之德續承

太祖高皇帝洪業圖惟至理敷求賢俊才智之士衆然衆
時而出而尤以進士為重自甲申至壬辰凡四設科矣
廷策之日臨軒命題

天顏悅懌覽闕所對第其甲乙嘗賜御批宸翰之華日星
照耀雲漢昭回光輝被及萬物士之登科者以時之遭

過歡忻相慶其用之也隆之以恩授之以官由是而位
通顯厯華要贊襄輔翊恢弘治績以致夫太平之盛豈
不媲美於唐虞三代之時哉

皇上嗣大庠服聰明天錫聖學日新治法

祖宗登用俊良於策試進士恩意倍加而先朝題名之碑
必徇臣下之請者重惟

太宗皇帝道大德弘治功之成巍巍赫赫底于極盛垂裕
後世實選士用賢之所致光昭太烈對揚休命刻之金
石以傳示永久者政在於今日也嗚呼盛哉凡姓名列
於斯者蓋亦榮矣雖然名著於外者也士可尚虛名乎

百五人者至于今多居位食祿得名於時無矜其名惟
辟歟忠誠建功立業以求其實使他日觀者以其賢而
稱頌之無指其名而議之斥之則進士之名庶可以無
忝矣臣英既謹為之書又敢以此勸夫為士者焉

崇德重修儒學記

嘉興屬縣曰崇德縣儒學歲久圯壞大理卿熊公以巡
撫至縣首謁學宮視其頽獎命縣令丞為脩葺之會臨
川鄧莊朱為縣學教諭與令丞丞為之經營焉鳩工聚
材卜日興作先師廟及兩廡則葺而新之靈星門明倫
堂東西二齋暨會饌之堂撤其舊而重建之既成莊以

書屬戶部主事沈章來請記予未敢執筆而章之父桂芳受封為主事詣闕謝恩復申以莊之請乃不敢辭竊惟賢才致治之本而學校則教育賢才之地也自古育賢莫先於建學我國家

列聖相承弘敷文教崇重儒雅屢下詔命有司脩學宮教官謹師範生徒脩德業士之有成出而致之於用者概光輝赫功績茂著蓋後先相望也嗚呼盛哉

皇上仁聖文武績承大統尤重於學校此者命禮部簡太學生與天下郡縣學弟子賢者俾之卒業無良者悉罷黜之蓋無非欲士之育於學者皆得其人而學之建不

為虛設也。即乎縣令與為之師者，可不究心乎？然愛不加意者，亦豈無哉？崇德之學久矣。美熊公作興之，莊與令丞能振勵而俾之成，使學宮巍然而崇煥然而新。二三君子可謂能體

上之聖意而賢才教育，豈不有其效乎？將見士之來游者，必濟濟乎衣冠之盛，鏘鏘乎絃誦之聲，勤於詩書，敷於德行，出為天下國家之用者，未必不知所自，勉以昭其勳績而著其聲望哉？熊公之所欲興學者，有望於茲。故書以記之。工之始在某年某月，訖於某年某月。熊公名槩，字元節，吉水人。永樂中進士，累官至大理卿，知縣某

縣舉其莊字士瑞某年貢士訓導某其協力董工者某
官其人云

王氏祠堂記

王氏居金谿繡谷之陽宋迪功郎宗達自臨川來居以
儒相傳至英凡七世矣元時居字弘偉家多圖籍悉燬
于兵吾父重創於洪武甲子冬既成而棄養英年始十
一賴先祖母吳孺人先母太宜人教訓伴讀書紹先志
既出仕列官于

朝餘三十年而所居仍其舊比英子監察御史裕奉詔歸
展祀丘墓乃改作舊居建祠堂肇工於正統元年丙辰

冬十二月明年夏四月成祠前直外門其三面皆子孫
之居祠之制與祀之禮儀一準文公家禮而守護致閑
有典掌之人戒約有條章焉夫祠祀先祖以崇孝道故
古者營居室必先祠廟此君子所當為也英蚤孤且弱
無他兄弟居不能致力於孝道仕不能效勞報國家日
夕兢惕恐懼然於祠之作則未嘗敢忘今幸已祗薦祀
事而孫曹日且衆多皆先世德善所致為子孫者可忘
其所自哉繼今當誦詩書敦孝友守忠信循禮義毋驕
侈毋矜傲毋淫放沉湎違道悖德有玷前人至於享祀
之時登降之際必致其精意毋斯頃不敬毫髮不謹則

神靈昭格洋洋在上必降之福以隆世澤否則反是蓋
人之生本乎祖宗一氣相傳誠意感孚理必有應可不
惕然凜然於此乎英年已六十有二未得謝事而歸祇
拜祠下以罄其誠而深懼後人未知祠之禮當謹乃為
記俾格刻石以垂示之繡谷一名錦繡墩為居之後山
居東接連縣簿私第而通學宮南限以街其右則二三
同姓所居非族也街外之西學門之右洪姓者故址今
創居則英之第五子揣也姓同者間錯其中恐久而相
混併記于石其詳又載諸家譜云

重建蔡涇記

常州畿內大郡也其屬縣江陰之南十五里曰夏港其
東有閘曰蔡涇南引湖水北通太湖兩側蘇松漕運及
閩越商賈之舟皆經此而江陰武進無錫三邑之田凡
數千頃皆資以灌溉遇旱湖涸江潮退則禾稿死舟不
可通有閘以節制其水則田不病旱舟不病涸矣閘之
創相傳始於唐歷宋元以及

國朝因其舊雖設官掌之而歲恒圯壞輒役民脩治用力
甚繁而其功不可經久民與舟往來者病之知府莫侯
之至常也政舉民安聞蔡涇久為民病欲圖改作以其
事奏于

朝既擬其請詔巡撫工部侍郎周公為之經度公受命與
莫侯議當撤其舊而新之有言新作則勞費滋多其功
難成者公毅然力主其可初公因民有餘粟積於諸郡
倉庾皆充至是會計其用可數十年矣乃發粟市材用
諸物惟石艱得乃取於姑蘇洞庭山工者亦蘇人令琢
磨以舟載至皆給粟償其力石計四千五百丈木二萬
二千株輓二十萬鐵一萬斤有奇工匠計百八役民二
千五百人食以粟計二千九百餘石始於正統元年八
月以是年冬十一月成堅壯倍於舊時而開之啟閉有
節歲旱有備舟行無阻今獲其利而不知興作之勞也

父老相與慶幸述周公莫侯經畫之詳來請記以示久
遠嗚呼河渠溝洫其利於人甚大昔創制之法與夫廢
興得夫人所共知而為政者莫能興其利至近時尤甚
焉其故何哉不知水之利為民衣食之源故漫不加意
欲有所興作者或謀慮不周或力不足任或懷私因以
培刻其下安能興利以及民哉今天下糧賦北上供億
者蘇松居其半歲時漕舟如山列運夫如雲集扶搖或
纒者綿亘不絕若商賈之舟尤不可以數計而其道皆
由募浚水可使之涸而閘可使之久壞乎莫侯欲作之
既知所先務周公能力成之而使民不知勞功大而利

博非有謀有為舉動無私焉能至此其功不亦偉哉刻石以記其成者固宜乃為之書周公名忱字如永樂甲申進士累官刑部員外特拜侍郎巡撫南京畿內善政不可殫述莫侯名愚桂林人由工部郎中陞知常州以正直自持稱為賢守後之人觀二公之成績亦當有思乎

東山小隱記

吉水珠溪之上有山曰東山山之陽錢君遂容所居而題曰東山小隱山高而奇秀岡巒逶迤相屬林木茂密環之以溪流水清而深傍溪多良田遂容之居得溪山

之勝讀書論文之暇或坐茂樹追涼風或登山望遠或
臨流把竿而釣或厯平疇以觀耕稼倦則休焉此遂容
志之所適故謂之小隱夫隱者深居山澤晦迹韜光士
之恬淡無求於世者也今之人所好則異往來奔走馳
逐相與競名利快意於時以隱為不足尚而遂容獨異
於流俗如此非所謂恬淡之士邪雖然古之隱者非徒
隱也隱則尊德而樂道出則行道以濟時孔子曰隱居
以求志行義以達道斯人也世固未之多見遂容豈不
有志於斯當

聖明之朝必將出而行其志豈徒隱於東山哉錢故大槩

世多顯者今翰林學士習禮遜容之兄也故為記以期
其志之有成無終於隱復招之以詞曰

東山盤盤兮縈以溪沅山雲轅轅兮溪水悠悠山之麓
兮水之洲亂石磊磊兮古木蟠蚪蘭芷芬馥兮木黍盈
樽子所隱兮宅其幽浩歌長吟兮恣遨遊志安恬兮復
何求繫古隱民兮其誰與倚胡不憤悱兮思更其猷東
山東山兮子不可以久晉

吉水泥田周氏祠堂記

宣德七年壬子秋七月翰林脩撰吉水周君功叙新作
祠堂成室宇有規劃祭自其始遷之祖沂濱公而下親

疏有等祭之禮升降進退有節供養有田祭器及儀物
有定品禮成享胙少長會聚有序會而相告戒有條章
祠之守護林木之培植各有專責蓋功叙於祠之制悉
倣朱子家禮而防範維持之計尤加詳焉初功叙之專
人兵部員外郎岐鳳先生與族之長者以作祠命功叙
功叙早夜汲汲謀欲為之會其族兄備撰時簡沒奉
詔護其喪以歸乃亟為之圖不憚勞力故宗族爭相資助
而又佐以其族叔子堅族兄時立經畫以其兄功而
郡之太守陳侯本采署縣事知州柯侯暹守禦平戶李
侯敬王侯業閭之亦皆來協贊其事故祠不勞而成功

既成之明年功叙請記余未獲執筆後三年為正統元年丙辰功叙遣其子蒙還鄉必欲以記歸刻石于祠堂示其後乃按其所具作祠經制之詳而書之如此嗚呼古者公卿大夫皆立家廟以祭其先祖所謂祭者豈徒然哉崇孝道也是以入廟則肅肅乎其敬致祭則懂懂乎其有思彷彿之間若聞其音殷接其辭色也精神感通祖考來格孝思之至如此後世其禮廢人有自為祭者惟其意之所欲又甚至於自祭亦有所不逮者此宜細故哉不知孝道者也人不知孝則禮廢矣是故惟君子則以行莫大於孝禮莫大於祭而祭其先之禮不敢

廢弛於是立祠堂而祭使族之人皆得以展其誠敬焉
此其能敦乎孝道庶幾古人之遺意今功叙力能行之
非君子哉夫所謂君子者以其有孝行也然化民厚俗
亦莫切於孝曾子謂慎終追遠民德歸厚是已功叙於
歲時之間薦事有常禮文既備誠意斯盡於是耄擇衣
冠革止以燕以休既和且樂矣凡其鄉人子弟近而觀
禮者必翼然而知敬遠而聞之者必翕然而景慕人人
將興起其孝愛之心而俗化歸厚豈不在於斯乎祠之
作所係者豈直周氏一族哉為其後者於祀事又禮與
所謂維持經久之計當世世守之勿改庶乎功叙之志

矣周本三國吳將公瑾之後公瑾次子都卿侯胤請廬
陵因家焉代多顯人後徙其邑之烏東徙居他處者甚
多而來居泥田者實始於沂濱公公沒與夫人俱葬泥
田其地沃衍山水深秀公之子孫久而益蕃且顯若功
叙父子之清德碩望並美兼著者是也故周栻在吉者
以泥田為最盛環公墓而居者數百家祠堂在墓之南
百餘步此皆所當記者故併為之書

環碧樓記

君子之所好常異於人者非有出於耳目之外凡其幽
曠閒淡之景足以寓吾之意者皆可以自娛耳山之高

也水之深也草木之森蔚也煙霞雲霧之舒歛也數者之景舉天下有之心知所好而不厭則寓於目而得其趣高者可以仰止深者可以俯窺而森蔚舒歛者可以觀其暢達敷芬變化之理舉天下之樂所不及而他物有不足以動其中者矣故傳曰仁者樂山知者樂水惟君子惟能然乎予知有好脩之士王君季傳在縣治東二里許前有幕嶺翠雲諸山獻奇疊秀而庭之外有泉泓然而出其流匯為小溪逶迤而注溪左右有竹萬竿君別構樓挹山而面溪嵐光波影與竹樹相映蒼翠之色郁然可愛遂名曰環碧樓君年已六十用有司薦為

醫學官褒衣大帶雍容揖讓卿黨甚榮之而居尤謙退
不自矜伐嘗坐樓中把周易及岐黃之書焚香默誦或
與賓客笑談歌咏終日不倦蓋自得夫山水之景以為
樂所謂仁知者其殆庶幾歟夫常人之情有一命之爵
則志驕氣盈服文繡乘車馬而美居室以夸耀於里巷
之間於山林泉石烟雲草木荒閒之景邈然不暇顧而
君獨能知所好誠有異於人哉君適來京師相見之頃
且曰吾與子先大夫游辱與子為友吾之甚好斯樓也
幸為我記之予不敢辭又嘉君榮遇於晚年而操履愈
篤故為之記使登斯樓者知君之志予他日南歸尚當

與君酌酒凭闌而賦之也

觀德亭記

射六藝之一非技藝之比故古人於射非敢有所妄發也禮曰射者進退周旋必中禮又曰內志正外體直然後持弓矢審固持弓矢審固然後可以言中此可以觀德矣而孔子又曰君子無所爭必也射乎其爭也君子則射之為藝君子之事也

國朝稽古為治天下學校生徒皆令習射而射必有圖金谿縣學舊圖在學之東北隅稍西高阜有亭射則止於此圖與亭廢久矣縣丞四明劉侯均智欲拓圖構亭而

監祭御史新安程富好禮適按巡至縣命知縣王忻及
均智與主簿汪昊典史譚琛亟為之均智請獨值其事
於是充拓舊圃作亭于故址之上既成額曰觀德凡諸
禮也均智考績來京師道其故且請為記嗚呼士之所
學者六藝也彼不知射之當習者多矣程公能振起之
均智能成之士之游于學宮者於講習之餘可忘於射
乎可不以此而觀其德乎禮又曰射者不中則反求諸
己夫一藝尚如此况其他也哉士當知所勉也已予幼
嘗習射茲聞今仕而老矣將乞身南歸尚可與諸君子
較其藝其能與我有爭乎亭之建在宣德九年甲寅九

月冬十一月而成弘雅有加于昔而記則明年夏五月也

王文安公文集卷之四

男祐編集

碑銘

贈禮部員外郎吳公尚文合葬銘

洪熙改元之初詔群臣之賢而久於職任者賜之誥勅
又推恩及其親於是禮部員外郎吳渭起濱之父尚文
公追贈奉直大夫協正庶尹禮部主客司員外郎母贈
宜人後四年爲宣德三年戊申起濱以疾辭歸田里泣
告於子曰先子歿諸孤微弱今墓木已拱矣而未有銘
刻幸蒙

朝廷褒贈之典宜刻銘以昭恩光紀潛德唯執事是賴乃

以狀授予予與起濱同郡相知久誼不可辭按狀吳氏
居宜黃者系出唐太史兢兢七世孫諱宣居西蜀閬州
宦游江南遂家于南豐州宣之後八世諱竦者始自南
豐徙居宜黃之棠陰里竦六世孫諱洪仕為主簿號柳
塘先生行誼最高柳塘生沙縣縣丞俊發號蘭芷俊發
生國學諭仲英為公之曾祖也學諭之子德明富而好
義有田八萬頃歲積穀以濟貧乏鄉稱為長者公之祖
也德明生鄉貢進士漢臣公之父也公諱賦尚文其字
性謹厚穎敏博涉經史嘗從鄉先生袁伯儀究六書法
喜攻於書居家敦孝友尚仁信不矯不詭務為坦直於

事侃侃善辯論時人稱其通才元至正末江西行省臣起爲瀘溪巡檢方是時四郊多壘盜賊充斥公雅不樂竟棄官而歸

天朝海宇平一公深自晦遜謝絕賓客惟教子弟讀書史優游山林意泊如也士大夫高其節待元至正庚申八月卒洪武壬子十一月十一日宜人姓龍氏同邑名族也慈淑勤儉克相夫理家政德儀式于閨閭後公十九年卒合葬本里小原蕉陂之山其地琴形陰陽家以爲吉兆也子三人起淵以才學薦將授官而卒次起潛亦蚤世起濱自鴻臚寺序班陞禮部主事又兩遷至員外

郎好學而有守女二人適黃時猷歐陽西壁孫男康歡
寬塋燦世亮曾孫男極昌寧孫女崇嘉孫女婿黃金南
嗟夫公承世德之厚能安養恬退既有行誼而又得賢
配以相成厥家賢子孫以昌大其後歿而榮膺贈典此
天之報乎德善也宜夫刻銘以垂厥休銘曰吳氏奕世
有名德棠陰之族蕃以碩公惟勵行匪矯激叔世不仕
隱自適相之賢配家苑殖繼以令子仕有績華秋之贈
天所錫

龍光下賁何顯赫我爲銘詞刻堅石垂休百祀永無斁
孺人陳氏墓誌銘

金谿傅氏居邑之西山里自宋統領諱某之後世多聞人今監察御史克己實統領公十世孫也克己之孺人陳氏亦同里右族元進士建昌路錄事諱昇之從孫隱士伯周之女也歸于傅氏二十年永樂壬辰七月二日以疾卒于京師太平門之私第享年四十男二人至善至德女二人進觀黔觀孫男二俱幼方李時亮已適莊事鳳陽惟至德與女黔觀在側號哭告諸親舊爲治喪既而至德奉柩歸于故鄉明年春亮已始還京師請予銘令二子刻石葬孺人于里之某山予與陳氏傅氏舊爲通家而孺人之長女又許壻予長子裕故知孺人

之德為詳銘弗敢辭孺人諱某性柔慧而端重簡靜不
妄言笑初克己孤弱奉母夫人與二兄極孝愛孺人亦
小心承順無有懈怠而尤勤於紡績綴織至於井臼之
勞皆躬自任之及克己貢太學擢黔陽縣典史居官常
清儉服用不給孺人泰然自安已而徵入朝拜監察御
史人皆榮之而孺人亦無喜色勤儉如昔時積月俸之
餘歸創田宅以奉老姑又為婚其二子家亦裕如以是
閨門之中稱其賢淑而克己無內顧之憂得專於官守
者孺人相助之力居多其後來京師也未暮年竟卒不
起是可哀也為之銘曰處貴與貧守儉與勤亢殖其家

以遺後人懿有全德式于閨門於昭斯銘雖死如存

故鄭母太夫人王氏墓碑銘

太夫人姓王氏諱某贈通議大夫兵部左侍郎鄭公某之妻兵部尚書楚之母也楚十歲而太夫人棄世侍郎公篤教以詩書楚益奮志力學第進士起家監察御史累陞至尚書以不獲侍太夫人享厚祿風木之思恒切於懷而又以

朝廷推恩褒贈自太恭人加太夫人恩光賁及幽邃而墓石未刻以昔嘗聞於舅氏所言太夫人懿行手疏其實請銘於予其詞質而哀有足感動人者予不敢辭乃叙

次而銘之王為太族居郡之宜章太夫人祖父人皆
敦士行母氏太夫人生有至性幼讀內則女教諸書
動止必循禮則及笄歸配侍郎公益謹於禮奉蒸嘗以
潔事姑以至孝而理家政以勤睦姻族以義待下以仁
惠內外交贊其賢侍郎公初為邑司訓徙家學宮之傍
太夫人喜曰昔孟母以遷居近學舍可以居子吾慕此
久矣諸生來學者必執贄為禮歲時必奉儀物太夫人
以其間多貧者請與之以歸奉其父母侍郎公曰此正
吾意自是凡有饋遺俱卻之太夫人端靜不妄言笑不
好華飾衣惟布素食惟蔬食其清儉蓋如此卒以甲戌

正月十四日年三十有九葬邑西山之陽子二楚操履
廉正識量私遠卓然為時名卿次塾敦謹好禮義女一
適 孫男 孫女 適 嗚呼楚蚤失太夫人勤學至
顯官名望崇重有如昌黎韓子太夫人歿已五十餘年
贈典累加始以銘為請有如歐陽公所謂非敢後也蓋
有待者是也銘曰

世稱賢母脩母之德維太夫人母教可則維孝維慈維
恭與仁以殖厥家亦維勤儉胡不中壽莫究斯理委祉
于後徵在二子憲憲二子曰楚曰塾太司馬腰金佩玉
維太夫人再膺贈典寵光赫然貴于幽窶於昭其德刻

銘堅石嗚呼休哉百世無數

故處士蕭君墓誌銘

宋史忠義傳蕭雷龍嘉泰中進士初判衢州元兵破衢城郡官屬散走獨雷龍不去率衆力戰復其城陞知府事再陞兵部侍郎江西招撫使督府叅議後城陷還旴起鄉兵奔聞意圖興復竟遇害雷龍世居旴之新城蘭魁坊子姓蕃盛元文林郎新城縣尹芳可其曾孫也芳可之子益厚能賙恤貧乏鄉稱為長者益厚子克啓明毛氏詩洪武初以儒碩徵至京入對多所陳說欲用之以病辭歸克啓之子則故處士諱茂字景彥也處士端

敏嗜學元季兵戈繹騷嘗躬耕以養克啓公與母饒孺
人而克啓公性嚴毅以禮法繩諸子惟處士恭謹肅雍
蹈其規矩甚得公之歡心焉處士與昆弟處和睦交朋
友信義而理其家勤勵不懈鄉里咸稱其賢初雷龍建
祠堂奉先歲首合族人展祀禮已乃會拜以叙長幼又
置田以給祀事田入勢家禮廢久矣處士捐貲歸其田
祠祀乃復舉有司嘗選民子弟之秀者為庠校諸生多
避去不就既而縣丞趙文吉教諭劉舉處士長子
雲舉充弟子處士欣然從之是時克啓公尚無處
士致禮送雲舉至學屬仲諭訓勵之又構屋所居之東

顏曰存心齋雲舉旦夕歸得講習其中雲舉既充貢入
太學授合浦縣丞道經故里省侍處士鄉人祭之舉曰
一官佐遠邑耳何足為親祭處士聞而語之曰丞百里
之佐何負於汝恐女負於丞也能盡其職斯可無愧雲
舉至官甚廉能有聲然任性介直以令簿庸暗稍卑視
之政由已出彼束手無所措而吏民之豪猾者輒繩之
以法處士聞之自驅馳嶺海至合浦痛責雲舉且戒之
益慎所守而謙讓以處同列仁信以撫下人雲舉唯唯
遵教縣以大治秩滿以政最選試事內廷而處士得疾
家居疾劇會何君本清官海北還家處士趣之相見曰

君與予有姻好且嘗與吾兒雲舉同學是兒今留京師
吾疾不可起矣屬君為告之吾家世稱忠義子孫居官
當以廉正忠勤為本貪暴驕縱為戒能守此庶幾不愧
前人吾瞑目無憾矣君謹識之明日遂終永樂甲申十
二月十七日也生元至正癸未八月十五日春秋六十
有二葬邑西蓮河之原配江氏賢淑有婦德子男四長
鶚即雲舉次鳳鵬鵠女二淑靜淑貞嫁為士人妻孫男
七瓚通星曆舉為陰陽學訓術次瑾琰璵璣璵璣孫女七
媛英玉英婉儀婉容智英彭英曾孫九俊傑健偉佐佑
侃倬傳曾孫女二瓊婉容雲舉自縣丞陞徐州同知再

陞和州知州所至有善政民愛戴之比自和來北京而
本清以給事中留秘閣纂修經籍見雲舉語及處士遺
言雲舉大慟曰平生守官不敢縱肆者恐負先人遺訓
耳所愧恨者先人歿已久而墓石未刻無以昭白潛德
罪莫大焉然知先人之行惟先生能詳之本清乃述以
授之雲舉丐銘於予嗚呼予雖未獲一拜處士而知雲
舉之歷官廉而且能卓然有足稱道者非處士之教有
以致之歟則處士之善於茲可槩見矣乃叙次其事如
右而銘曰

蕭故大族居于新城憲憲雷龍有赫厥聲在宋之季判

于衛城失其守強兵雖吁雷龍奮呼力戰復之衛人遂
安力終莫支嗟嗟雷龍不貳厥志捐軀赴難死以忠義
其澤不泯有子有孫芳可尹縣弘其聲聞益厚克啓以
紹以述嗣以處士孝友忠實家訓既嚴廢禮緩舉有偉
令子克邁訓語自佐下邑以至州守惟廉惟仁為民父
母處士之善數遺在茲宜爾孫子不忘孝思蓮河之山
佳城差我刻銘垂休百世不磨

故將軍前北平都指揮僉事武公墓碑銘

國家受命隆興文武才傑之士乘時而出相與效勞勤弘
功烈昭其聲光及于後嗣者蓋甚多也此豈偶然哉龍

興而雲從虎嘯而風生熊羆武勇之臣蓋必生于盛明
之世若故都指揮僉事武公亦其人也公諱勝字世
居鳳陽南宿州之門鄉曾祖 祖 父諱德

太祖高皇帝龍興之初挺身相從隸籍行伍以力戰而歿
公代之屢從討伐潁川侯傅公之征雲南也公領衆為
先鋒克普定曲靖敗其守將攻東川烏蒙烏撒大理等
處克之已而從宋國洪公平溪洞諸蠻永昌侯藍公杞
征至捕魚兒海俱有功充帶刀總旗尋陞燕山中護衛
百戶征迤北還授昭信校尉

太宗文皇帝起義靖難公以驍勇著稱垌上白溝薊城滄

州夾河東昌之戰輒賈勇當先無敢嬰其鋒者及大軍
至淮先遣公銜命渡江遂為敵兵所害時洪武三十五
年五月十六日也壽若干以卒之年葬宛平縣城南
沙河北娶氏封恭人子一人興公自百戶陞千戶累
贈至將軍北平都指揮僉事性慷慨輕財好義果敢善
戰以父早歿歲時蒸嘗輒悲痛不自勝奉母孫氏恭人
盡孝道公之歿也

上深悼之永樂甲申命興襲指揮使賜世襲誥命俾食全
祿興屢以征戍有勞今陞萬全都司都指揮同知嗚呼
公承先世之德奮勇而起立功盛時誠所謂才傑之士

也而又能委身死忠祿及後嗣垂其休光永永不磨夫
豈不宜哉興以狀丐銘刻諸墓道爰撫其實如右而銘
曰

皇明受命天眷隆文武賢俊如雲從將臣勇鷙有武公克
嗣世德懋厥功身歷百戰氣愈充敵強孰敢嬰其鋒艱
難不顧竟殞躬志節顯著位望崇卓爾後嗣慶所鍾鎮
禦外服能折衝沙河之北山麓從刻銘堅石昭勲庸公
之休光垂無窮

故徵士劉君令聞墓誌銘

劉故大姓居陳留朱磨勘三司諱式名最顯磨勘之夫

人陳氏積書萬卷以教其五子號曰墨莊五子皆仕其
後析居臨江者至攸敬二兄弟俱名臣官至師傅子孫
多顯宦又析居于金谿其族益蕃諱傑字良甫官至中
書工部尚書弟信甫福州府同知皆有盛名於元尚書
之孫思學國初為給事中從子鳴永樂間進士擢監察
御史其他為郡縣及有文行而隱者甚多也諱彌顯字
令聞者同知之孫處士諱裡之子御史鳴之從子也處
士娶陳氏生子七人令聞居二性穎敏讀書史通究義
理孝事二親友愛兄弟居鄉和樂謹禮節輕財尚義人
有患難疾病往赴之不憚勞苦饑乏用苦者輒解衣推

食有所不吝為非義者則懇懇開譬令其改行嘗至南
地二京大學士文穆胡公學士解公魯公莫不器重之
或勸之仕則曰某素寡學術此非所敢望也晚歲作寶
墨堂藏先世書籍以遺子姪又置別墅于雲林之太平
里為往來遊息之所平生好賓友四方名士至邑必傾
貲款筵與之登山臨水觴酌笑詠雖累月不倦里有冠
婚喪祭必請主其事兄弟同爨而食族有孤子女為婚
嫁盡禮其操行蓋如此生洪武乙卯二月二十八日宣
德甲寅六月二十日以疾卒享年六十娶楓源徐氏繼
高富魯氏子一人時讀書工書翰女一人適詹德魯出

也孫男一俞女孫二卒之明年其弟全緒走京師徵銘以葬予與令聞居同邑里世篤嫻好知其家世行誼之詳而比歲以先妣太宜人憂還鄉凡喪葬經理令聞兄弟致力居多聞訃慟哭食不下咽者累日尚忍銘其墓邪而於誼則不可辭也銘曰

劉為鉅姓世顯赫磨勘在宋著偉績墨莊之蓄惟六籍子孫憲憲善慶積師臣攸敬尚書傑給事御史仰遺烈猗嗟令聞惟好德臨仁履義嘉譽溢六十而逝孰云耄刻茲銘詞賁玄宅後景仰者過必式

故趙母太宜人鄧氏墓誌銘

贈奉政大夫脩正庶尹工部屯田司郎中南豐趙公叔
彥之妻太宜人鄧氏以宣德庚戌六月十四日卒秋九
月其孤濟聞訃于北京匍匐號慟南歸以 年 月
日葬太宜人於其鄉神隆原附于奉政公之墓以狀徵
予銘以納諸幽予與濟同登永樂甲申進士第相知久
誼不可辭按狀太宜人諱院字院直其邑名族也祖新
可父從善以賢良徵授橫海衛知事歷郟城連城二縣
令母孺人黃氏太宜人性慈惠克脩保姆之教習論語
內則小學通大義亦善於書連城君與黃孺人鍾愛之
擇所從以趙故宋宗室而奉政君最淳厚遂以妻之太

宜人入門事姑李最孝謹李目青凡二十餘年旦暮躬
盥擲奉湯液未嘗離元季兵興奉政公之父蘭泉翁避
亂棄家入閩及亂定竟弗返而家業盡廢惟奉政公孑
然力經營之太宜有莊廬田百餘畝負郭而膏腴乃課
僮僕耕以給食蚤夜自治絲枲為布帛以資服用畜鷄
豚牛羊以供祭祀賓客久之廣室廬增置產業家道復
故時矣奉政公恒痛悼蘭泉翁遠歿太宜人亦悲泣歲
時奉蒸嘗必敬必豐暨奉政公卒哀毀過甚率諸子治
喪葬盡禮初連城君二子蚤歿君繼卒太宜人奉母黃
家居供養凡五十餘年年九十而終愛敬無始終有間

太宜人勤以持身義以睦親族肅以正家諸子若婦侍側諄諄然以古道訓勵之平生儉薄不喜華飾鄉黨稱其孝敬慈順比之古賢母云濟起家翰林庶吉士擢刑部主事陞北京衛部郎中有政績

朝廷賜誥命推恩於親故奉政公與太宜人膺是顯命焉濟以郎中秩滿再陞中順大夫順天府府丞秩正四品太宜人當加太恭人命未下而卒壽七十有七其生之年則元至正甲午二月二十九日也子七人長即濟字東濟次東渡東淵東浚東清東溫七保皆端謹有時譽而東渡東浚七保先卒女三人適鄧省吉樂思信魯仕

寧子與濟游幾三十年夙聞太宜人賢淑而狀稱太宜人侍奉政公四十餘年盡相夫之禮哭奉政公又二十有三年盡教子之道於予之所聞者可徵誠所謂賢也已而終乃享有祿養膺受褒寵夫豈不宜哉乃叙次其懿行如右而銘曰

維婦德與母儀持孝敬敦儉慈嗟宜人兼盡斯貴且顯享壽祺乃令終茲其宜時佳城刻銘詩示來裔孝思百千世垂光輝

故徵士葛君夷簡墓誌銘

宣德癸丑十一月二十八日徵士葛君夷簡卒其子麟

奉前監察御史江君勝之狀丐銘以葬徵士于其鄉之
其山按葛氏居金谿縣東之葛坊宋建炎間諱麇者以
才勇見稱金兵圍臨川麇集鄉兵禦之著名當時子才
美第進士知星子南平二縣有政聲自是子孫多顯者
諱繼祖博學之士諱均雋元經筵書佐諱仲貞金谿縣
學訓導人尊稱爲貞逸先生實徵士之曾祖祖與考也
母孺人劉氏徵士性敦敏孝親友兄弟承貞逸先生之
訓讀書探索義理居鄉循雅敦士行恬於進取絕不與
流俗爲伍先生及劉孺人相繼卒徵士哀毀踰制葬祭
盡禮平生不崇信浮屠虛誕之說卒於處鄉黨宗族朋

友則輕財重信義無詭異流薄之習諸子且長篤教訓
之嚴肅有規矩晚歲悉付以家事優游於山林泉石之
間日以觴咏為樂鄉邑士夫高其行生洪武壬戌十二
月初六日卒時年五十有二娶曾氏子四人麟茂盛布
女三人適桂崇信次適訓導王祐又次許嫁吳孫男三
孫女三余幼從貞逸先生游知徵士最深及仕于朝相
別者幾三十年比歲南還見徵士顏未如少壯時與賓
客款曲輒舉酒勸酌不大醉不止然終不失禮度也其
風度益愈於往昔而操履之善則未嘗改徵士非賢而
有德者歟乃不辭麟之請叙次其事如右而銘之銘曰

葛有世德曷弘所施展也徵士其賢孔宜孝友敦恪譽昭於時令終其年歸藏于斯永垂厥休墓有銘詞

贈奉政大夫越王府左長史程公墓碑銘

仁宗皇帝臨御天下封建諸王簡拔老成文學之士為主輔相以兵部武庫郎中程君新克稱其任擢越王府左長史既而賜朝臣誥敕推恩褒及其親而新之先君子季城公追贈奉政大夫仍越王府左長史又二年為宣德丁未新請于朝歸槨黃昭其光寵且立碑于墓以紀潛德奉給事中何君澄之狀徵余為銘按狀程氏世居建昌新城縣之東坊程家嶺公之曾祖諱 宋朝奉郎

祖諱毅元湖廣肅政廉訪副使考諱李生蓄德弗仕母
宜人張氏公諱城季城其字也資質頎偉性剛介幼不
與群兒嬉戲長嗜學不倦勵行以古人自期遭二親喪
悲號毀瘠三年如一日見者哀之季弟璋親沒時方孩
提公扶携保養之及長婚娶而三兄相繼亡力為殮葬
育其孤子女而教之愛之踰於己子其後孤從子皆有
成豫以明經薦擢知鄆州卓有政聲公處家嚴正循禮
法自奉儉素歲收田園之入量度所用而儲其羨餘俟
歉則以濟饑者與凡貧困患難婚喪不能舉者悉助焉
交友黃士良以事沒其子幼且貧為治喪具而葬之公

平生寡言笑於人不較短長入毀之而不怒而譽之無喜色也然於事能逆料又能辨折是非曲直里有爭訟者質之輒一言而決偷薄之徒亦靡不信服多困之而改行云洪武初郡守縣令交章舉孝廉茂才辭不就或辰詔辟耆德又力辭之竊語人曰孔子謂居家孝友奚必為政此吾之志也歲延鄉先生李尚志于家塾教諸子及宗族子弟公察諸子新獨敏悟語尚志曰是兒必興吾門先生善教之公素無疾一日忽得疾執新臂曰吾不仕進有待於汝汝惟以孝敬忠謹自持庶幾立身顯名吾疾不起矣慎無忘吾言言畢而逝時洪武己巳六

月五日也公生元至正庚辰七月十二日享年五十葬
縣之張白原金船峯之陽配許氏子男六人騶虞大鋪
永兒新永住益保新洪武丙子舉于鄉起家長寧縣學
教官上䟽言時政陞雙流縣知縣有政績陞刑部主事
再陞郎中河南布政司叅議優入為武庫郎中所至以
廉謹見稱女二人適桂德麒 仲輝孫男七人鳳儀適
蚤世通馬愉榜進士次遙進選遇孫女雲英適朱 曾
孫女三人嗚呼公以孝敬仁信之德孝于鄉為鄉人所
敬服可謂有德長者雖黜光弗耀而於既沒之後有賢
子孫以顯揚之獲受褒贈榮光赫然豈非天之報公也

哉惜予未得拜公而幸與新游景仰之私固不能忘迺
叙次其言行如右而銘之銘曰

奕奕程宗著于新城善慶所鍾惟公之生廉訪之孫隱
君之子承厥家訓稽經誦史既孝既友既信且仁撫孤
恤卑周給困窮公之善行既孚于時未施其蓄豈終嗇
之龍章煌煌光賁玄壤天報公德毫髮不與金船之陽
繚其高原時以佳城刻銘堅珉惟公子孫歲時至止展
其孝思百世弗替

故永豐陳處士墓表

吉之永豐遷鶯鄉有著姓陳氏其先諱舜舉者自金陵

從居焉世以詩書仕宦相傳至處士克良甫力本務善
隱居不仕有譽于鄉其子曰誠舉進士為兵部武選主
事卓然有聲於是處士之名益著處士諱美克良其字
性和厚自幼恭謹兄弟三人而處士居長孩童時過隣
曲親故之家凡飲食有味輒不食白以歸奉吾親與吾
弟是時二弟猶在襁褓也及長制行彌謹二親沒哀毀
踰制蔬食凡三年撫二弟教之讀書以時婚娶人以孝
友稱處士者無間言也處士公恕平直人有非義者輒
相戒曰勿令陳處士知之有爭訟者多詣處士質之為
引說道理剖析曲直聞者無不悅服恒語人曰忿爭者

心不平故耳能以心度人則心平而無爭矣縣行鄉飲
禮令丞必請處士真之賓位人以為當然處士以家世
尚儒乃力教諸子以學誠既第進士為武選恒以書訓
戒之諄切甚至宣德甲寅以疾卒享年七十有九州郡
閭里無少長皆哭之哀處士曾祖諱得甫祖諱與仁考
諱至德俱有文行母李氏配謝氏賢淑有德子四人篤
祐篤學篤篤巢篤叙誠即篤學也女一人適張孟集孫男二
孫女三誠聞訃匍匐南歸以年 月 日葬處士於
鄉之 山奉翰林編脩鍾復之狀泣請予文表諸墓
予嘗聞處士名而雅知誠之為人乃不可辭而竊有所

感歎焉昔應山連處士卒歐陽以其孝友恭讓能調恤鄉里教成其子終以布衣而應山之人哭而哀之為表其墓處士之行蓋無異於連處士也豈可使泯沒無傳乃述其大槩俾刻石墓上垂于不朽焉

曾子唯墓誌銘

太學生曾子唯卒其同舍友番禺縣令余素履於予告曰素履與子唯同里在太學時子唯卒無三尺童子在傍其力為之歛迺其柩于鄉哀哉子唯也幸執事銘以垂諸不朽子亦為泣下曰子唯與予相友者十餘年矣今其亡也銘曷敢辭子唯幼穎悟善記誦詞賦人稱為奇

童弱冠力學不倦博覽子史及象山陸子之書歲授徒里中以選為郡庠生授書於危先生孟璞學易於謝先生原方二先生門弟子甚衆獨子唯秀出由是郡庠諸生咸推服子唯子唯退讓不自矜益勵志肆力為文章省憲臣至郡考課子唯輒居諸生之右既而上江西秋闈累試不利永樂七年貢禮部墜于太學甚有名譽再試應天府秋闈又不利人皆惜之子唯無毫髮介意力請歸省其母踰年還太學十一年車駕巡守北京明年子唯伴東南夷使者貢獻至行在予與之酌酒歡然而別又明年乙未三月二十八日竟以疾終于太學矣子

唯性孝友介直與人交始終如一平居循循然未嘗有
疾聲厲色惟誦詠詩書以適其情嘗曰吾才不若人得
分教一州邑與生徒講習討論使之有所造就足矣其
雅素蓋如此於乎子唯之言猶在也而子唯不可見也
子唯生洪武庚戌得年四十有六葬里之山娶桂氏
子一人牛孫其先蓋自南豐徙居金谿之上富里曾祖
祖父友~~其~~皆好學弗仕至子唯又弗大顯嗚呼誠
可悲悼也邪銘曰

嗟嗟子唯其蘊也融其所積也克宜躋于崇而亢厥宗
胡命之窮普而不通其後也宜豐

故吏部文選主事劉公士哲墓銘

宣德五年庚戌五月二十二日吏部文選主事劉公士哲以疾卒時惟幼子及一女在側遑遑莫知所指而卽中盱江鄭公率寮屬致賻且經理其喪事而刑部主事劉紹鴻臚寺序班吳與貞力為相之會監察御史同里李昌自南京來始克歸其柩于鄉焉初士哲疾革時屬春坊中允吳餘慶狀其平生歷履俾予為墓銘予與士哲為同年友其疾也與太學士曹公諸君子往問候及卒又往祭而哭之以失此良友為恨尚忍執筆銘其墓哉然以士哲有遺命也豈敢固辭按狀士哲諱濟世

居撫之崇仁曾祖 祖 父原亨俱讀書樂善士哲自幼穎敏端重為縣庠弟子員登永樂甲申進士第以選為庶吉士賜還鄉續學尋召至京

朝廷方脩永樂大典俾馳傳歸取吳文正公四經纂言以備編纂既至授山西臨汾知縣臨汾民貧多逋租苦吏撈掠士哲下車悉絕之與約及秋乃輸官民欣然如約皆無負欠有郭辛者最孝於母上其事得旌表其門閭是時方營建北京躬率民丁五千人伐木五臺山撫綏甚至皆樂於趣事以母憂去起復至吏部用翰林脩撰吳公德閏薦陞浙江按察僉事持法無私錢塘稅課吏

以巡闌攬開官錢櫃踢之致死臬司按吏當償命士哲
曰彼以私開官櫃吏踢之遂死是因公也不然亦誤耳
由是吏得減死按巡屬郡開化有豪猾吏呼為四虎者
宿為名害悉擒之至溫台督軍士捕倭寇聞風遁去金
華民夜投宿旅寓囊鈔百錠寄其家明日索之不還民
訴於士哲呼其人詰之不服士哲曰料汝實不知但憐
其宿汝家可解一衣償之既解衣潛使人持謂其母曰
爾兒以衣為信取夜來人所寄鈔母即付與之其人慚
懼乃遣其去寧波諸縣瀕海地不產木部符令採園可
十餘尺者且時方東作士哲言于

朝得免居職三年風紀大振坐數奏温州衛指揮不法語
大峻謫為民臨清洪熙元年監察御史賴英薦之起為
文選主事以廉勤自持選部稱為得人宣德四年蒙恩
賜敕命父原亨亦贈以主事母贈安人得請歸焚黃既
還朝遂得疾而卒士哲生庚申五月初七日春秋五十
一娶謝氏封安人側室傅氏子二人曰慈曰芭芭在京
師者女四人士哲性孝友直亮處心無阿曲為政知大
體與人交尚信義不以窮達易所守謫居臨清囊橐揭
然結草屋而居儲藥物玩古書以自適因號曰草廬云
嗚呼士哲之操行治績如此惜夫用而未究其志乃止

於斯寧不可哀也邪其葬以年月日其地在

鄉之山銘曰

湜湜劉公操行潔白既宰劇邑復典憲取才猷之施如
刃斯騷宜奮而騫胡致其跽既極乃飛亦豈終訖贊佐
卽署名位方陟溘爾而終孰不悼惜才未究用其德允
殖高山巖巖龍此堅石刻銘垂休永永無斁

故刑部左侍郎樊公墓道碑有銘

正統八年癸亥春正月辛巳刑部左侍郎致仕樊公卒
于其鄉訃聞

皇上以公舊臣遣官賜祭命有司治喪事卜以年月

日葬鄆城南飛折村先事公諸子奉教諭鹿巖之
狀來徵銘公官三品當樹碑墓道乃不可辭按狀公諱
敬字守一其先河南臨漳人曾祖號二翁徙東平之壽
張祖諱榮徙青州考諱誠始徙濟寧之鄆城當元季山
東擾亂為衆所推集義兵保障鄉里鄆人以安母氏
公穎敏好學補郡庠生洪武丁丑第進士授春坊司諫
改行人司副

太宗文皇帝續承大統擢公鴻臚寺丞尋陞少卿拜為卿
禮儀為之整肅永樂三年番舶至廣東有匿方物者陞
公廣東叅政兼理其事公至盡革其弊宣布恩意以慰

遠人且撫綏廣民入朝拜左通政命令出納無所壅蔽
八年六師征沙漠公總督兵餉明年督工陶甄甃於衛
河兩岸十二年又以征沙漠仍督輓運軍校違令者懲
之以法糧無乏絕至擒胡城又明年摠水運營造材木
頻年服勞于外二十二年召還陞刑部左侍郎菟剌宿
弊以清刑獄洪熙改元之初丁外艱起復清理淮西諸
衛軍伍運廣西征南糧餉取川蜀梁棟大材前後所委
俱奉璽書受命惟謹所至設施措置秩然有法人不知
勞而事皆辦集身歷五朝祇事

列聖凡四十餘年未嘗少有過德宣德八年以老致仕居鄉

教子孫務學力足跡不履城府至是年壽八十祖考俱
贈嘉議大大刑部左侍郎母贈淑人娶黃氏亦贈淑人
繼荆氏子男六人琦璣璵玘玘登鄉舉先卒玘嗜學
今為邑庠諸生女二長適李福次適宣聖五十八代孫
孔公恂孫男洵漢濟瀋孫女淑德淑貞未嫁曾孫男二
珣冲女二慶允靈芝但幼公神氣清爽篤學強記善言
語好禮尚義不詭不佞其外若嚴厲而中則坦然既享
有名位且能知止足歸而終以高年其始終進退之善
蓋如此謹叙次如左而銘之銘曰

樊始臨漳徙于齊魯再徙鄆城自公之父公父侃侃為

鄉義在公力於學致身顯位列卿藩佐納言之職寵任
惟專屬以繁劇漕粟瀚海伐材西川指麾成功不暴不
愆暨理兵籍暨典邦刑不懈惟勤不替惟明維時廷臣
孰踰於公謂公有為圖惟厥終乃懼滿盈乞身而歸終
以高年惟公其宜邛之城南飛折之里岡阜隆然玄室
斯闕樹此堅石鐫刻銘文昭公之德永昭後昆

故明威將軍金吾後衛指揮張公墓誌銘

太祖聖神文武高皇帝受天明命龍飛淮甸虎賁鷹揚之
將如雲龍風虎奮然而興相與建立大功垂名後世而
大江之西則有若番陽張公尤偉然者也公諱顯字叔

達累功至指揮僉事而卒公之孫演手疏公勲績丐予
為銘予少聞長老稱公能文有勇力好揮劍馳馬果以
武畧致身於公蓋素所敬慕今公卒為文誌墓以垂諸
不朽誼不可辭按張氏系出漢留侯之裔其後有居信
州者自信州徙番陽之東湖又自東湖徙安仁其地曰
若嶺則公十二世祖諱日新也至公之祖諱立仁以能
詩鳴考諱子東憚學工書贈武毅將軍神策衛千戶妣
李氏贈宜人公自幼慷慨有大志善吟詩好書史嘗讀
班超傳歎曰大丈夫立功名當如此日與諸年少習武
事或射獵馳騁人或誚之公曰士當平時尚文有事用

武今之時可局局自居乎方是時元政已衰矣未幾四方盜賊蜂起公與兄天啓首集義兵保鄉閭兄歿兵柄一屬於公會天下兵下洪都公乃說王溥率衆從叅政鄧愈歸朝公以驍勇克營軍總管從愈禽祝宗康泰繼討閭寇追禽偽元帥秀真歲甲辰天兵取贛州公率先登城以功克營軍千戶明年克建寧又明年為洪武元年陞崇仁衛千戶授武德將軍從都督耿公守太原平陽從曹國李公征迤北敗虜帥脫列伯已而出天城白登敗迷赤國公之兵至三不刺又敗王保保之衆還駐北平復出大石崖五峯山卒與虜遇公獨躍馬突陣斬

勇數十人敗武德衛千戶從征塞罕腦兒還領騎兵累
大寧釣水崖有功賜世襲誥命加武毅將軍西平侯沐
公討西番公為前鋒渡西黃河天大雪寇圍我軍急公
與敢死士力戰潰圍而出而公亦身被九創還朝

太祖親勞之命太醫賜藥而公之創日甚詔令公長子保
襲職為通州守禦所千戶公遂還鄉時洪武十四年也
明年起公至京師創亦愈擢知雲南麗江府是時雲南
初平徵武臣年高者往治其民公至為政寬恕教民以
詩書禮讓民乃大悅改績銓曹以課最見稱詔嘉之又
錄其舊勲陞金吾後衛指揮僉事階明威將軍尋命守

昌國温州三衛修城池練軍士全行政舉以年老乞身
詔許公致仕乃角巾藜杖南歸開別墅於番陽之新安
里日與故老子弟賦詩酌酒泊然自得公性倜儻而敦
尚孝友不事夸詡自起義兵以來身經百戰至享有名
位未嘗自矜喜有語公曰與公同歷戰陣多為倭獨公
位有不稱公曰是有命也顯赫甚者或害其後吾今日
優游田野庇及子孫豈不愈於彼乎聞者賢之平生所
著詩文有集藏於家生元丁丑五月二日永樂甲午八
月二十日以疾卒壽七十有八配劉氏封恭人子男四
人長保陸涼衛千戶先公卒次和次用次弘皆好學有

才藝女三人王恕黃鑑鞠剛其壻也孫男六人長演襲
神電衛指揮僉事次喜德九德重德志德景德曾孫男
一人曰祐曾孫女六俱幼以卒之年月葬若峯先塋之
之次嗚呼公蚤有文學乃投筆立功名致貴顯所謂際
會風雲聲施當世而慶流子孫者公其有之或謂不稱
其功者未足以論公也叙而銘之於法為宜銘曰

惟我

太祖受命自天龍飛淮甸神武赫然熊羆之士鷹揚之臣
雲合而從以建大功惟公桓桓留侯之裔稽經讀史卓
有大志投筆而起奮其忠誠殄絕諸寇南服底定乃從

大將屢伐殘虜轉戰萬里深入其阻陰山之北黑水之
涘飲血累創戰必誓死凱還大庭勞賚有恩賜歸于鄉
憫其勞勤公歸踰年有詔起公公之再來髮白顏童擢
守南詔惟公舊人加秩金吾惟公之勲公惟耄矣乞身
南歸壽考是宜公享壽考終始無愧有位有名有孫與
子伐石勒銘樹之新阡嗚呼公德垂千萬年

故徵士黃公墓誌銘

徵士黃公諱禮字仲迎別號耕叟正統丙寅月
日以疾終壽七十有三明年冬葬於公別墅白馬鄉碩
村之山其孤廷恕奉進士王芳之狀遣人北上請銘黃

為大族其先居行之官溪唐末諱表者為撫州節度使
兵馬留後表之後應龍台州守吳老國史編脩俱有名
德子孫以簪纓相傳至公之祖諱榮為贅壻於金谿曹
氏遂家邑學之南黃之居金谿者始於榮也榮之子諱
真質偉而性介直公之父也公兄弟二人公居長端重
寬簡幼學於其從父彥昭甫繼從訓導葛仲真先生遊
勤學工書楷喜賦咏而不求利達奉二親孝處兄弟和
二親棄養事繼母益謹居鄉交友待人誠信愷樂未嘗
有疾聲厲色見_市浮薄者棄之鄙之有善行者尊_升之
貧匱者調之以財乙卯歲歎盡發所儲粟以賑饑者鄉

人感其惠縣令欲舉其才行固辭以家富產業辟充賦
稅長辭弗獲徵科以時不擾於人上下宜之嘗營別墅
於石村鑿池種花竹構居置腴田督僮僕耕耘故號曰
耕叟乃以稅賦事任諸子往游石村其村之人喜而相
迓還舊居則邑之賢士聚而相迎候不嗜酒待賓客必
欲其盡醉訓子諄諄然以立心務忠厚讀書繼前人為
言公之制行蓋如此娶段氏有賢德先公卒子四人長
廷恕次益慶衍慶三保女一人適李燦孫男十六人孫
女四人子與公居同里授學於彥昭甫嘗同筆硯知公
為詳既仕于朝不相見凡二十餘年以奉詔歸省始得

會晤別又二十年矣方圖休致與公游懋泉石以叙情
好而公遽逝矣惟公之行誼異於流輩宜大書以昭其
幽

